

EUSKAL SINDIKALISMOAK IZUGARRIZKO JENDETZA BILDU ZUEN ATZO BILBON EURI ZAPARRADA ITZEL BATEN AZPIAN

«Hau da batasun sindikala»

■ Maiatzaren Lehenak jaitik gutxi eta erreibindikaziotik asko izan zuen atzo Bilbon. Euskal sindikatuen mobilizazioak argi utzi du gizarte fronte zabala sortu dela 35 lanorduen eta soldata sozialaren alde. Euskal Herriko langabeziari eta bazterketari aurre egiteko gizartea inarrosi nahi duen frontea, hain zuzen.

Joseba Aiarza / Bilbo

OLDEAK izan ziren atzo Bilbon euskal sindikatuak deitutako manifestazioak: jende oldea eta euri uholdea. ELAk, LABek, ESK-CUISek, STEE-EILASEk, Ezker Sindikalak, EHNEk, Hiruk eta Giza Eskubideen Agiriaren aldeko Herri Ekimenak milaka lagun biltzea lortu zuten, eguraldia ezin kaskarragoa izan arren.

Manifestazioak ordubetean egin zuen Etxetxutik Areatzara arteko bidea. Aurreneko pankartak manifestazioaren lelo nagusia zeukan idatzita: «Inor ez lanik gabe. 35 orduak. Beharrezkoa eta posible da». Pankartaren atzean, manifestazio bateratua deitu zuten zortzi sindikatuak buruzagiak zihoazen.

Manifestariak oihukatutako lelo nagusiak 35 lanorduen eta soldata sozialaren aldekoak izan ziren, baita aparteko lanorduen eta patronalaren aurkakoak ere. Manifestazioak Plaza Biribilaren aurrean gelditu eta itxaron behar izan zuen, beste alde batetik zetorren CCOO eta UGTren manifestazioa —jende urriagoa— pasatu arte.


Areatzak San Nikolas elizaren aurrean gaita joleek abegi egin zioten manifestazioari. Euri zaparrada inoiz baino indartsuagoa zenean, Maite Aristegi, Rafa Diez eta Jose Elorrieta hizketan zuzendu zitzaizkien euripean bildutakoak.

Hiru buruzagiek baikortasunez betetako mezuak adierazi zituzten: bertan euskal gehiengo soziala zegoen, eta aurreneko aldiz bat eginik azaldu da kalean Maiatzaren Lehenean.

ELA eta LABen inguruan eratutako fronte bateratu hori iraunkorra eta oparoa izango den ustea azaldu diote EILAS, ESK, Ezker Sindikala, EHNE eta Hiru sindikatuak buruzagiek egunkari honi, «edukietan adostasuna dagoelako».

Kale eta pankarta berean • «Euskal Herriko gehiengo sozial eta sindikala bildu gara kale eta pankarta berean», esan zuen Elorrietak. Elkartutako indarrak lan harremanetarako euskal esparruaren aldekoak ziren, eta horregatik «hau da benetako batasun sindikala, iraunkortasun eta eduki zehatz bat daukana», esan zuen.

«Hemen denok sar gaitzek, guk ez dugu inor kanpoan utzi; batasun honetatik kanpo daudenak eduki hauekin bat ez datozenak izan dira, lan erreforma sinatu zutenak eta Hego Euskal



Bilbon atzo egin zen manifestazio jendetsua, goian. Ezkerrean, Jose Elorrieta eta Rafa Diez, ELA eta LABeko arduradunak. MIKEL MARTINEZ

Herria bitan zatitzen dutenak», adierazi zuen Elorrietak, handik zenbait metrotara bilduta zeuden CCOOri eta UGTri buruz ari zela.

Rafa Diezek «elur bola» batekin alderatu zuen 35 orduko lan astearen eta soldata sozialaren inguruan sindikalgintzan eratutako frontea. Helburu horien aldeko kanpainaren lehenengo fasea amaituta, «ilusioz beterik gaude. Lana eta aberastasuna banatzeko helburuz, enpresarien eta instituzioen jarrera itxia hautsi behar dugu. Enpresariak

badute kezkatzen hasteko nahikoa arrazoi», adierazi zuen.

Greba orokorra • Diezek enpleguaren aldeko kanpainaren bigarren fasea iragarri zuen, greba orokorra ekarriko duena; izan ere, «gizarteak gero eta erantzun bortitzagoa eman behar baitio langabeziari eta prekarietateari».

Maite Aristegi EHNEko presidentea bildutako gainontzeko sindikatu txikien izenean mintzatu zen. Hego Euskal Herri osoko hainbat lekutako langileak, langabeak, baserritarrak,

irakasleak eta garraiolariak elkartu izana azpimarratu zuen.

Aristegik gazteak eta emakumeak aipatu zituen, kolektibo horiek langabeziak eta prekarietateak gehien jotakoak baitira. «Guztiok lan merkatuan sar gaitzen lortu behar dugu. Nahitaezkoa eta posible» da.

Hiru ordezkari sindikalen hitzaldien ostean, Aristegik bertso bat doi-doi bota, bildutakoek Internazionala eta Eusko Guda-riak kantatu eta kontzentrazioa aterpe bila sakabanatu zen korrika batean. x

esanak

Belen Arrondo ♦ EILAS

«Oso egun pozgarria da, sindikatuen batasuna gertatzen delako, eta, irakaskuntzaren mundutik begirata, ikusten dugulako posible dela lanpostuak gehitzea». x

Juan Carlos Lopez ♦ ESK-CUIS

«Jardunaldi honek itxaropen handia ematen digu, euskal mugimendu sindikalak urte askotan ez duelako honelako bilgunerik lortu. Erronkarako garaia da hau». x

Maite Aristegi ♦ EHNE



«Bat gatoz enpleguaren banaketaren aldeko kanpainarekin, nahiz jakin baserrian ez dela posible

35 lanorduak finkatzea. Helburu nagusia lanik gabe inoiz ez egotea da, eta horretara jotzen dugu». x

Modesto Garcia ♦ Hiru

«Oso positiboa da gaurko eguna, hartu beharreko bidea borroka eta batasunarena delako. Harro gaude, lana eta justizia soziala lortzeko dagoen bide bakarrari jarraitzea lortu dugulako». x

Juan Ramon Garai ♦ Ezker Sindikala



«Euskal sindikatuok lortu dugun batasunean behar-beharrezkoa da defenditzen ditugun

erreibindikazioak denon artean praktikara eramatea. Sindikatuok gehiago inplikatu behar dugu ordu estren aurka». x

Jose Ramon Castaños ♦ Herri Ekimena

«Gizarte Eskubideen Agiriaren aldeko Herri Ekimena euskal sindikalismoaren gehiengoak gonbidatuta etorri gara, sindikatuak Agiriarekiko sustengu osoa adierazi dutelako. Sustengu hori guztiz garrantzitsua da, baina ez da aski, alderdiek ere bultzatu behar dutelako». x